

CARTA ALAXTO TET ANMA HEBREO AYXAKO YUL ISQ'AB' KOMAM DIOS

Tzotel Komam Dios tet anma yu Isk'ahol

1 ¹Yet yalanhtokanoj tx'i'al el yeb' nanantanhe yu istzotel Komam Dios tet eb'ya' jichmam yu eb'ya' ischejab' Komam. ²Yaja' wal yinh islahob'al tiempo ti' tzotel Komam Dios jet yu Isk'ahol, ha' xin yul isq'ab' Isk'ahol tu' yakaniko sunil tzettaj ye tu'; yuto yu Isk'ahol yuxin iswatx'e Komam sunil tzet ay yul sat yib'anhq'inal ti'. ³Ha' Isk'ahol Komam tu' chiyenilo isq'aq'al yip Komam Dios yeb' yechel Komam yehi. Ha' xin yip Istzoti' Isk'ahol tu' iq'nhe sunil tzettaj ay yul sat yib'anhq'inal ti'. Lahwi konhissajnhenkano Komam K'ahole yinh komul, yok tz'onhno yinh iswatx'q'ab' Komam Dios yul satkanh.

Kaw ek'b'al yelapno Isk'ahol Komam Dios yib'anh eb'naj ángel

⁴Isk'ahol Komam Dios, kaw ek'b'al yelapno ye yib'anh eb'naj ángel; yuto ha' ismunil Komam ek'b'al yelapno ye yib'anh ismunil eb'naj. ⁵Wal xin machi hunu eb'naj ángel b'ay yal Komam Dios haka' yu yalni tet Komam Cristo:

«Hach ti', hach Ink'aholan, chiwaq'kanojan hakawil yinh hune' tz'ayik ti',»^a xhi Komam.

Maxhtaj yinh hunu eb'naj ángel b'ay yalpaxo Komam haka' ti':

«Haninan Ismam naj. Ink'aholan ye naj,» xhi.

⁶Chalnipaxo yinh yet yaniti Komam Dios humpilan Isk'ahol yul sat yib'anhq'inal ti':

«Yiq'ab'ayo isb'a sunil eb'naj yángel Komam Dios tet naj,»^b xhihayoj.

⁷Walpaxo yinh eb'naj ángel chal haka' ti':

^a 1:5 Sal. 2:7; Hch. 13:33 ^b 1:6 Dt. 32:43; Sal. 97:7

- «Chuteko Komam Dios eb'naj ángel haka' jaq'eq' kat yutenpaxiko Komam ischejab' haka' xaj q'a q'a',»^c xhi.
- 8 Walpaxo yinh Isk'ahol Komam tu' chala:
 «Hach Dios, yahaw hach yinh sunilb'al tiempo. Ha' istoholal xin chawatx'e yet ayachiko Yahawiloj.
- 9 Kaw chaxhtzala yinh isk'ulal, wal istx'ojal xin chayaha.
 Yuxin sik'b'il hachilo yu Komam Dios haDiosal.
 Kaw ek'b'al tzalahilal yaq' tawet sata eb'naj hawetb'i,»^d xhi.
- 10 Chalnipaxoj:
 «Hach ti' Mam Wahawil yet yicheb'anil hawatx'e tx'o tx'otx', hawatx'enpaxo satkanh.
- 11 Sunil tzet watx'eb'il hawu tu' chitanhkaniloj.
 Wal hach ti' xin ayachnhetik'a yinh sunilb'al tiempo.
 Sunil tzet watx'eb'il tu' chi'ichamb'iloj haka' chu isxilb'ilo hunu xilq'ape.
- 12 Chapajtzoyo haka' chu ispajtzolaxayo hunu q'ap q'ap, kat hahelni haka' chu ishelni hunu mak xil isq'ap,
 yaja' wal hach xin hune'nhetik'a ha' hach yinh sunilb'al tiempo, machi b'aq'inhal chaxhtanhiloj,»^e xhihayoj.
- 13 Machi hunu eb'naj ángel b'ay yal Komam Dios haka' yu yalni tet Isk'ahol:
 «Ayanh tz'onhno yinh inwatx'q'ab'an masanta chiwaq'a'kojan makta ayko ishowal tawinh yalanh hawoj,»^f xhi Komam.
- 14 Sunil eb'naj ángel espíritu eb'naj, ayko eb'naj ischejab'o Komam Dios yu iskolwa yinh makta chischah iskolb'anil.

Hune' kolb'anile kaw niman yelapnoj

2 ¹Yuxin kaw yilal janiko konab'al yinh hunteq'an kuyb'anile ab'eb'ilxatik'a ju, haxinwal mach chikohek'ilo kob'a yinh. ²Yuto ta hunteq'an chejb'anile yal eb'naj ángel yet payxa kaw ay ismay yukanoj, yuxin ha' mak manhk'oni, ay isya'tajil yib'anh haka' kaw yehi. ³Hajxamonh chal tu', tzzettaxka chu kokolcha tet isya'tajil ta mach chikam kok'ul yinh hune' kokolb'anil kaw niman yelapnoj? Yuto ha' kaw Komam Jahawil halni hune' Tzoti' yet kolb'anile ti' yinh b'ab'el-al, haxa eb'ya' ab'eni, ha' eb'ya' aq'ni johtanhelo yinh kaw isyelal. ⁴Yeb' xin ha'tik'a Komam Dios yako isb'a testigohal yinh hune' Tzoti' K'ul yet Kolb'anile ti' yu ej yechel yip Komam yeb' yu ej k'ayb'alk'ule, yeb' yu tzettaj aq'lax yub' eb'ya' yu Komam Espíritu Santo haka' el yinh isk'ul Komam Dios.

Hune' mak b'ay tit kokolb'anil

⁵Maxhtaj yalanh yip eb'naj ángel yakto Komam Dios hune' yul yib'anh-q'inal b'ay lanhan kotzotel ti', hune' chitohuli. ⁶Yuto ay hune' b'ay chal yul Yum Komam Dios haka' ti':

^c 1:7 Sal. 104:4 ^d 1:9 Sal. 45:6-7 ^e 1:12 Sal. 102:25-27 ^f 1:13 Sal. 110:1

«¿Tzet yelapno ye anma yuxin chanatij?

¿Tzet yelapno ye anma yuxin chawako yinh hak'ul?

⁷ Paxna hanik' hawute hawatx'en anma sata eb'naj ángel.

Lahwi tu' hayenilo ismay yeb' xin kaw ay yelapno elikoj.

⁸ Hawaniko sunil tzet watx'eb'il hawu yalanh yip anma,»^g xhياهوj.

Yet chalni tato sunil tzettaj ye tu' kan yalanh yip anma, chaliloj tato machi hunu tzet ye tu' ti' mach kan yalanh yip, yaja' maxhto ixtanho jilni ta ayko sunil yalanh yip anma. ⁹Yaja' wal Komam Jesús, Komam paxna utelax hanik' tiempohal sata eb'naj ángel yu Komam Dios, aq'lax ismay yeb' kaw ay yelapno elikoj yu isya'tajil kamikal, yuto yu isk'ulch'anil isk'ul Komam Dios yuxin yaq' isb'a yinh kamikal yu isk'ulalo jinh.

¹⁰Komam Dios watx'enhe sunil tzettaj ye tu', yeb' yu Komam yuxin iswatx'e, choche tato sunil yuninal chischah ismajul satkanh kat yek' yinh isk'ulch'anil Komam; yu yaq'le Komam Jesucristo isya'tajil, yuxin aq'lax ismunil yaq'ni iskolb'anil anma. ¹¹Sunilonh ayonhxako yuninalo Komam Dios ti' hune'nhe Komam yeb' hune' mak konhaniko yuninalo Komam tu', ha' ton xin Komam Jesucristo. Yu hune' tu' yuxin ha' Komam Isk'ahol Komam Dios, mach chitx'ixwi konhyalni yuxhtajoj, yeb' eb'ix janab', mach chitx'ixwi Komam yalni eb'ix yanab'oj. ¹²Haka' yu yalni Komam Jesús tet Komam Dios b'ay chala:

«Chaxhwalik'ojan tet eb'naj wuxhtajan yeb' tet eb'ix wanab'an.

Chaxhinh'itnhepaxojan xol, yet chiskutxb'an isb'a,»^h xhi.

¹³ Ay hune'xa b'ay chala:

«Yinh Komam Dios chikawxi ink'ulan,» xhi.

Ay hune'xa b'ay chalpaxoj:

«Ayinik'ojan b'ey ti' yeb' wuninalan xayaq' Komam Dios wetan,»ⁱ xhi.

¹⁴Yuxin ha' nimanile iq'b'il yu Komam Jesucristo lahan haka' isnimanil eb'naj ayko yul isq'ab' Komam. Hayet iskam Komam xin isq'oji yinh yahaw kamikal, ha' ton naj matzwalil. ¹⁵Hak tu' xin yu iskolni Komam sunil mak ayikto yalanh yip xiwkilal kamikal yinh sunilb'al ej hab'il.

¹⁶Yuto maxhtaj yinh eb'naj ángel hul Komam kolwal, wal xin to ha' eb'naj titna yinh ya' Abraham hul Komam iskolo'. ¹⁷Yuxin kaw yilal yuteko isb'a Komam haka' hanhonz yuxhtajonh ti', yu istz'ay isk'ul jinh yeb' yu yok tzotelo jinh tet Komam Dios, haka' hunu ya' yahawil sacerdote kaw yijem, yaniko isb'a Komam xahanb'alil jinh yu yelkano komul jib'anh. ¹⁸Yuto ek'lana Komam Jesucristo yinh isya'tajil yeb' yinh ilweb'al yuxin ay yip Komam iskolwa jinh yinh ej ilweb'al chul jib'anh.

Kaw ek'b'al yelapno Komam Jesús sata ya' Moisés

3 ¹Yuxin hex wuxhtaj hex wanab', hex yet hexxa Komam Dios, awteb'il hex yu Komam yu heyok yuninaloj. Kaw kam cheyako henab'al

yinh Komam Jesucristo, Komam chejb'ilti yu Komam Dios yeb' chitzotel jinh tet Komam haka' hunu ya' yahawil sacerdote, ha' yinh Komam tu' xin ayko janma.

²Komam Jesucristo tu' kaw yijem yute isb'a tet Komam Dios yinh hune' ismunil aq'lax tet; hakpax tu' ya' Moisés, kaw yijem yute isb'a ya' yinh ismunil aq'lax xol iskonhob' Komam Dios. ³Yaja' Komam Jesús, ek'b'al yelapno Komam sata ya' Moisés tu'. Haka' hunu naj chi'anikanh hunu te' nha, ek'b'al yelapno naj yib'anh te' nha chiswatx'e tu'. ⁴Haka' hunu te' nha tinanh, yilaltik'a ay hunu mak chi'anikanh te', hak tu' xin ye sunil tzettaj ye tu', ha' Komam Dios watx'enhe.

⁵Hak tu' xin ya' Moisés kaw yijem yute isb'a ya' ismunla xol iskonhob' Komam Dios yuto ischejab' Komam Dios ye ya'. Ha' xin ismunil ya' ha' yalni tet konhob' yinh tzet chal Komam Dios. ⁶Wal Komam Jesucristo Isk'ahol Komam Dios yehi, kaw yijem yinh ismunil yul Yatut Komam Dios. Hune' Yatut Komam tu' xin ha' ton hanhoh ti', yaja' ta t'inhan iskawxi kok'ul yinh tzet ayko yipo janma yinh kaw tzalahilal.

Hune' xewilal chaq' Komam Dios tet iskonhob'

⁷Yuxin yul Yum Komam Dios chala ta yal Komam Espíritu haka' ti':

«Tato cheyab'e tzet chiwalti'an hanin Dios inti'an,

⁸ mach cheyaq' kawxo heyanna haka' yu yok anma manhk'omal wetan b'ey tx'otx' desierto, kinyanikojan yinh ilweb'al.

⁹ Ha' b'ey tu' kinyakojan heyichmam yinh ilweb'al, waxanhka yil eb'naj hunteq'an isk'ulal inwatx'ehan yulb'al 40 (kawinaj) hab'il.

¹⁰ Yuxin tit inhowalan yinh hunteq'an anma tu', walnihan:

“Nanantanhetik'a b'ay chato hunteq'an anma tu' isnab'al, maxhtik'a chohtanhelo inb'ehan,” kinchihan.

¹¹ Walnihan yu inhowalan haka' ti': “Hunteq'an anma ti' maxhtik'a chischah hune' xewilal chiwaq'an,”^j kinchihan,» xhi Komam yul Yum.

¹² Yuxin hex wuxhtaj hex wanab', kaw cheyil heb'a, machojab' hunujex cheyaq' kawxolo heyanna, machojab' hunujex cheb'ej heyanniko heyanna yinh Komam, kat heyinilo heb'a yinh Komam Dios itzitz. ¹³Wal xin hununobjab' tz'ayik heyiptzen heb'a hunun hex, yaq' isb'a lanhan istzotel Komam jet haka' yalni yul Yum, yunhe machi hunujex chexsub'cha yu mule kat iskawb'ilo heyanna. ¹⁴Yuxin ta linhanonh yinh sunilb'al tiempo yinh tzet jako yipo janma yet yalanhtokanoj, ay komajul isk'atanh Komam Jesucristo.

¹⁵Yuto chal yul Yum Komam Dios:

«Tato cheyab'e tzet chiwalan tinanh hanin heDiosal inti'an,
mach cheyaq' kawb'olo heyanna haka' yute anma manhk'on yinh
tzet walan,»^k xhihayoj.

¹⁶¿Mak xin anmahil hunteq'an eb'naj lahwi yab'en Istzoti' Komam Dios ismanhk'on yinh tzet yal Komam tu'? Ha' ton eb'naj jet konhob' Israel yilti ya' Moisés yul konhob' Egipto. ¹⁷¿Mak yinh xin tit ishawal Komam Dios yulb'al 40 (kawinaj) hab'il? Ha' ton hunteq'an mak yako ismul tet Komam b'ey tx'otx' desierto, iskamkano b'ey tu'. ¹⁸Yeb' xin, ¿mak tet yaq' b'inaho Komam isb'i yet yalni tato mach chi'okto yul hune' xewb'al chaq' Komam? Ha' ton tet makta manhk'on yinh tzet yal Komam. ¹⁹Hak tu' chu kotxumni ta mach okto anma yinh hune' xewb'al chaq' Komam tu', yuto mach yayto yul yanma yinh Komam.

4 ¹Yuxin yaq' isb'a chito haltelax jok yinh hune' xewilal chaq' Komam Dios, hune' halteb'ilkano yu Komam, yuxin kaw yilal cheyil heb'a, tajka ay hex mach chexok yinh hune' xewilal tu'. ²Yuto hal-laxpaxo Tzoti' yet kolb'anile jet haka' yu yal-lax tet eb'naj jichmam tu', yaja' xin matzet iswatx'e yinh eb'naj yet yab'en eb'naj, yuto mach yako yanma eb'naj yinh. ³Wal hanhoh xajayto yul janma yinh Komam chonhok yinh hune' xewilal chal Komam tu'. Yu chal yul Yum Komam haka' ti':

«Waq' b'inaho inb'ihan, walnihan yu inhowalan tato maxhtik'a
chi'okto hunteq'an anma ti' yul hune' xewb'al chiwaq'an,» xhi
Komam.^l

Yinh kaw yeli hataxtik'a yet iswatx'enkano Komam Dios sat yib'anhq'inal ti' isxew Komam yinh ismunil, ⁴yuto chal yul Yum Komam Dios yinh ishuj tz'ayik haka' ti':

«Xew Komam yinh ishuj tz'ayik yinh sunil tzet iswatx'e,»^m xhihayoj.

⁵Chalnipaxo yul Yum Komam:

«Hunteq'an anma ti' mach chi'okto yinh hune' xewb'al chiwaq'an,»ⁿ
xhihayoj.

⁶Yaja' yilal ayto mak chi'okto yinh hune' xewilal tu' tinanh, yuto tet eb'naj Israel b'ay b'ab'el hal-lax Tzoti' yet Kolb'anile, yaja' mach okto eb'naj yinh hune' xewb'al tu' yu ismanhk'omal. ⁷Yuxin ay hune' tiempohal yeb'ilkano yu Komam Dios, ha' ton hune' tiempohal b'ay ayonh ti' tinanh. Payxatax halb'ilkano yinh hune' xewb'al ti', yaq'nipaxo Komam yala' ya' David yul Yum Komam, b'ay chala:

«Tato cheyab'e tzet chiwalan tinanh hanin heDiosal inti'an,
mach hipo cheyute heb'a,»^o xhihayoj.

⁸Q'inalo ta ok eb'naj Israel yinh hune' xewb'al tu' yu ya' Josué machim tzotel Komam Dios yinh hune' tiempohal b'ay ayonh ti'. ⁹Yuxin ay hune'

^k 3:15 Sal. 95:7-8 ^l 4:3 Sal. 95:11 ^m 4:4 Gn. 2:2 ⁿ 4:5 Sal. 95:11 ^o 4:7 Sal. 95:7-8

xewb'al chaq' Komam tet makta yetxa Komam yehi. ¹⁰Yuxin makta chi'okto yul hune' xewb'al chaq' Komam ti' chixewkano yinh sunil ismunil, haka' yu isxew Komam yet lahwi iswatx'enkano hune' yul sat yib'anh-q'inal ti'. ¹¹Yuxin jaq'a'weko yinh kok'ul jokto yinh hune' xewb'al chaq' Komam, yunhe machi hunujonh chikob'eyb'alnhe isb'eyb'al eb'naj manhk'om tu'.

¹²Yuto Istzoti' Komam Dios kaw itzitz sunil chisje yu, chiq'axpon yul janma haka' hunu ch'en espada kab'eb' yeh. Istzoti' Komam tu' chi'apni yinh janma yeb' yinh konab'al yeb' yinh tzet jehi. Chisyenilo tzet chi'ek' yinh konab'al yeb' yinh janma, ta k'ul maka mach k'uloj. ¹³Sunil tzet watx'eb'il yu Komam Dios, machi hunu chu yeb'an isb'a sata Komam. Sunil tzet ye tu' hab'an ye yul sat Komam, Komam b'ay chijal tzettaj chikowatx'e.

Komam Jesús ha' chitzotel jinh tet Komam Dios

¹⁴Komam Jesús Isk'ahol Komam Dios, xameltzo satkanh, ha' chitzotel jinh tet Komam Dios, yuto yahawil sacerdote ye Komam. Yuxin yilal kolinhb'an kob'a yinh kuyb'anil b'ay ayko janma. ¹⁵Wal Komam yahawil sacerdote tu' chu istz'ay isk'ul jinh yinh koya'tajil, yuto hayet yek' Komam yinh isnimanil koxol kaw tx'i'al ilweb'al hul yib'anh haka' ej ilweb'al chul jib'anh, yaja' machi b'ay yako ismul Komam. ¹⁶Yuxin yinh sunilobjab' janma chonhhitziko isk'atanh Komam Dios Jahawil, Komam kaw xahan ayonh yu, haxinwal chitz'aypaxo isk'ul jinh kat konhiskolnilo yinh ej isya'tajil chihul jinh.

5 ¹Yuto sunil eb'ya' yahawil sacerdote sayb'ililo eb'ya' xol anma, yaq'lax ismunil eb'ya' istzotel yinh anma tet Komam Dios, yeb' yu yalten ofrenda yeb' xahanb'al tet Komam yinh ismul anma. ²Eb'ya' yahawil sacerdote tu' lahan eb'ya' yeb' yet anmahil chihoyxipaxiko ilweb'al yinh eb'ya', yuxin chu istz'ay isk'ul eb'ya' yinh makta machi isnab'al yeb' yinh makta k'aynatoj. ³Yuxin yilal yalten eb'ya' xahanb'al yinh ismul b'ab'el kat yaq'ni eb'ya' xahanb'al yinh ismul anma. ⁴Machi hunu eb'ya' tonhe ok yinh hune' munil kaw ay yelapno tu', wal xin to ha' Komam Dios saynheko eb'ya', haka' yu issaylaxiko ya' Aarón. ⁵Hakpax tu' Komam Cristo mach tonhe yako isb'a yahawilo sacerdote ischukil, wal xin ha' Komam Dios aq'nhe hune' ismunil kaw ay yelapno tu', yuto ha' Komam Dios halnikano haka' ti':

«Hach ti' Ink'aholan, haninan chiwaq'an hakawil yinh hune' tz'ayik ti',»^p xhihayoj.

⁶Yeb' xin ay hune'xa b'ay halb'ilkano yu Komam haka' ti':

«Hach ti' sacerdote yinh sunilb'al tiempo,

haka' ya' Melquisedec,»⁹ xhihayoj.

⁷Yet yehik'o Komam Jesucristo yul sat yib'anhq'inal ti' kaw oq'i yeb' kaw ip txahli tet Komam Dios, isq'anni tet Komam Dios, Komam ay yip iskolni tet kamikal; yab'en Komam istxah yuto kaw yijem yute isb'a Komam. ⁸Waxanhka Isk'ahol Komam Dios ye Komam Jesús, yaja' hul isya'tajil yib'anh kaw xin yijem yute isb'a tet Komam Dios yu ej ilweb'al hul yib'anh. ⁹Yu isyijemal Komam tu' yuxin aq'lax ismunil yaq'ni kolb'anile mach istanhb'al tet makta chiyijen tzet chal Komam. ¹⁰Ha' xin Komam Dios anheko Komam Jesús yahawilo sacerdotehal yu istzotel jinh tet Komam, haka' ya' Melquisedec yet payat tiempo.

Kaw ay ismay ta chonhmeltzoto jintaj

¹¹Kaw tzetk'ato tzet chiwochehan chiwalan teyet yinh hunteq'an ti', yaja' ya'ta kexkowatx'eniko yinh yuto kaw lanho chitxumcha heyu.

¹²Yuto haka'xa istiepmohal yichi heyab'en kuyb'anile ti', kuywawom hexxam tinanh, yaja' wal xin ayto yilal hekuylax yinh yak'tohal yinh hunteq'an b'ab'el kuyb'anile yet Komam. Kaw haka' ye nixhte nene', maxhto chu yaq'lax hunu tzet ye tu' islob', to imeto chi'aq'lax tet, hak tu' heyehi. ¹³Hunteq'an b'ab'el kuyb'anile tu' yet mak maxhto chiq'oji istxumni yinh istoholal, yuto haka'to nixhte unin imeto chi'aq'lax tet, hak tu' yehi. ¹⁴Wal hunteq'an kuyb'anile ayxakanh xin yet mak ayxa isnaab'al yinh istoholal, xaq'oji istxumni b'aytet k'ul yeb' b'aytet mach k'uloj; ha' mak haka' tu' lahan haka' anma yihxa, chu islohni kawla tzet ye tu'.

6 ¹Wal tinanh xin, b'elwojonhwe kosataj, haxinwal kaw helan chonhelikoj. Kanojab'kano hunteq'an b'ab'el kuyb'anile jab'e yinh Komam Jesucristo, machojab' chonhok kokayenhe, haka' kuyb'anile chihalni yinh kob'ejnikano kowatx'en hunteq'an tzet chi'initi kamikal jib'anh, yeb' yinh tzet chu janiko janma yinh Komam Dios. ²Yeb' kuyb'anile yinh yah ha' kowi', yeb' kuyb'anil janayo koq'ab' yib'anh iswi' mak chichahni ismunil tet Komam Dios, yeb' yinh tzet chu yitzitzib'ikanh kamom, yeb' yinh isya'tajil mach istanhb'al chaq' Komam Dios tet anma. ³Wal tinanh xin ha' kuyb'anile ayxakanh ha' chiwalan teyet ta hak tu' chi'el yinh isk'ul Komam Dios.

⁴Ha' mak xachahni sajilq'inal yul yanma yeb' isk'ulch'anil isk'ul Komam Dios, yeb' xa'ischah isk'ulal Komam Espíritu Santo, ⁵yeb' xin xayab'e ischi'al Istzoti' Komam Dios, yeb' yinh yip Komam chisye yinh hunteq'an chihuli. ⁶Hunteq'an mak tu' ta chilo isnaab'al yinh Komam Dios, ¿tzettaxka chu ismeltzo yul isq'ab' Komam hunelxa? Yuto lahan haka' lanhan yanikanh Isk'ahol Komam Dios yinh kulus hunelxa, kat yaniko yinh tx'ixwilal sata sunil anma.

⁷Q'inalo tx'o tx'otx' tinanh, yet chilayaq'ni ha' nhab' kat yuk'nito tx'otx' ha'; ta k'ul tz'unub' chaq' tx'otx' tet naj chimunla sat tx'otx', ha' chaliloj ta ayayo isk'ulal Komam Dios yib'anh. ⁸Yaja' ta tx'ixnhe te' chaq' tx'otx' yeb' te' komon telaj, matzet ch'ok tx'otx' yinh haka' tu', chi'elto tz'akti' yib'anh tx'otx' yu Komam, haxa yinh islahob'al xin kat isnhuslaxkanto tx'otx'.

Kaw linhanojab'onhnhetik'a yinh tzet ayko yipo janma

⁹Waxanhka hak tu' kotzotelanh hex wuxhtaj hex wanab', hex xahan ay juanh, yaja' kaw johtajanh tato hex ti' ayxako isk'ulch'anil Komam Dios teyinh, ha' xin chalniloj tato ayxa hekolb'anil. ¹⁰Yuto Komam Dios is-toholal chiswatx'e, yuxin mach chisnahulnheto Komam isk'ulal hewatx'e yeb' isk'ulch'anil hek'ul heye tet Komam yet hekolwa yinh mak yetxa Komam Dios yehi, hune'nhe ha' xin lanhan hewatx'empaxo tinanh. ¹¹Kaw xin chijochehanh tato hak tu' chewatx'e yinh sunil heyanna yinh sunil-b'al tiempo, haxinwal tz'ajan chechah tzet ayko yipo heyanna.

¹²Mach chijochehanh ta chexisab'ilo yinh ismunil Komam; wal xin to b'eyb'alnhewe isb'eyb'al makta ayko yanma yinh Komam Dios yeb' ay isnimank'ulal. Makta chisb'eyb'alnhe haka' tu' chischah tzet halteb'il yu Komam Dios.

¹³Yet yaltenkano Komam Dios isk'ulch'anil isk'ul tet ya' Abraham yeb' ta kaw hantanhe yuninal ya', ha' isb'i Komam yaq' b'inahoj yet yaltenkanoj, yuto machi hunuxa mak ek'b'al yib'anh Komam. ¹⁴Yalni Komam haka' ti': «Yinh kaw isyelal, kaw tx'i'al isk'ulal chiwaq'an tawet, kat waq'ni pohchahokanhan hawuninal,» xhi Komam. ¹⁵Kaw xin niman yute isk'ul ya' Abraham tu' yechman yinh niman tiempo, lahwi tu' ischahni ya' tzet halb'ilkano yu Komam tu'.

¹⁶Hayet chaq'ni b'inaho anma isb'i hunu mak yinh hunu tzet ye tu', ha' isb'i hunu mak ek'b'al yib'anh ha' chaq' b'inahoj; yuxin hayet chaq'ni b'inaho anma isb'i hunu mak yinh hunu tzet ye tu' t'inhan chukanoj, matxa hunu mak chu yok tzotelo yib'anhiløj. ¹⁷Hak tu' yute Komam Dios, yaq' b'inaho isb'i yinh tzet yaltekanoj, yunhe isyenilo Komam tet mak b'ay yalte tu' tato t'inhan yukano yu Komam, mach chi'ek'to yet yijni isb'a yinh tzet yalte tu'.

¹⁸Hak tu' xin, ha' kab'eb' ti', mach chu ishek'ni isb'a yuto mach chu yaniko Komam leq'ti'al; ha' ton tzet yaltekano Komam, yeb' yaq'ni b'inaho isb'i yinh tzet yalte. Hak tu' chu konhyiptzen Komam yunhe iskawxi kok'ul yinh tzet halteb'il jet yu, hanhonh sayb'ilonh yu Komam yu konhiskolni.

¹⁹Ha' tzet ayko yipo janma tu', ha' chonhlinhb'ani kat yaq'ni ist'inhanil janma, haka' chu islinhb'an ch'en ancla te' barco yib'anh ha' mar. Hune' iskawxob'al kok'ul xa'apni sata Komam Dios haka'ta xaq'axponik'to yinta

q'ap velo aykanh yiktab'al Yatut Komam. ²⁰Hak tu' yu isb'ab'ikto Komam Jesucristo kosataj, ishajniano kob'eh. Hak tu' xin yu yokkano Komam tzotelo jinh tet Komam Dios; yahawil sacerdote yeko Komam jinh yinh sunilb'al tiempo, haka' ya' Melquisedec yet payat tiempo.⁷

Sacerdote Komam Jesucristo haka' ya' Melquisedec

7 ¹Ya' Melquisedec, ha' ya' isreyal konhob' Salem yet payat tiempo, yeb' xin issacerdote Komam Dios ye ya', Komam kaw aykano yip. Yet hunel xin yet isb'eyk'o ya' Abraham yinh hune' howal, isq'oji ya' yinh hunteq'an eb'naj rey. Haxa yet ismeltzo ya' Abraham, yul chalaxo ya' yul b'eh yu ya' Melquisedec; isq'anni ya' isk'ulal Komam Dios yib'anh ya' Abraham tu'. ²Yaq'ni ya' Abraham isdiezmohal sunil tzet yiq' ya' yinh howal tu' tet ya'. Hune' b'ihe Melquisedec chal yelapnoj: *Yahawil yinh kaw istoholal*, yeb' xin *Yahawil yinh aq'ank'ulal*, yuto ya' Melquisedec tu' yahaw konhob' Salem ye ya', Salem chal yelapnoj: *aq'ank'ulal*. ³Ya' Melquisedec tu' mach ohtab'ilo mak ismam ya' yeb' mak ismi' ya', yeb'paxo mak yichmam ya'. Machipaxo mak chalni yinh yet ispitzk'a ya' yeb'paxo yinh iskamikal ya' yuxin yechel yeko ya' yinh Komam Jesucristo Isk'ahol Komam Dios, yuto machi isb'i b'aq'inh lahwi ismunil ya'.

⁴Tinanh xin txumweloj hanta niman yelapno ye ya' Melquisedec tu', yuto ha' kaw jichmam Abraham aq'ni isdiezmo tet ya' yinh sunil tzet yiq' yet isb'ey ya' yinh howal. ⁵Haka' yalni isley ya' Moisés, eb'ya' sacerdote titna yinh ya' Leví, ay yip eb'ya' isq'anni tet yet konhob' isdiezmohal yinh sunil tzet aya, waxanhka xin yuxhta isb'a, yeb' yichmam eb'naj ye ya' Abraham. ⁶Yaja' wal ya' Melquisedec tu', mach titnajo ya' yinh ya' Leví, yaja' yaq' ya' Abraham isdiezmo tet ya'. Isq'anniano ya' isk'ulal Komam Dios yib'anh ya' Abraham tu', ya' b'ay yalte Komam Dios isk'ulal isk'ul. ⁷Kaw johtaj tato ha' naj chiq'anni isk'ulal Komam Dios yib'anh hunu maka, ek'b'al yelapno naj yib'anh hune' mak tu'.

⁸Eb'naj yuninal ya' Leví q'anni isdiezmohal sunil tzet ye tu' tet yet konhob', eb'naj tu' lekamto eb'naj, yaja' wal ya' Melquisedec xin chal Yum Komam Dios tato itzitz ya', yuto machi b'ay chal yinh iskamikal ya'.

⁹Chu jalni tato eb'naj titna yinh ya' Leví, eb'naj q'anni ch'en diezmo, ha' hun eb'naj aq'ni isdiezmo tet ya' Melquisedec yet yaq'ni ya' Abraham isdiezmo. ¹⁰Yuto waxanhka maxhto ya' Leví yul sat yib'anhq'inal ti' yet yul chahlaxo ya' Abraham yu ya' Melquisedec, yaja' ayxatik'a ya' Leví yinh ya' Abraham, yuto ichmame ye ya' Abraham yinh ya' Leví tu'.

¹¹Q'inalo tato yu eb'ya' sacerdote levita watz'iko anma Israel yul sat Komam Dios yuto yul isq'ab' eb'ya' sacerdote tu' ischah konhob' Israel

isley ya' Moisés, matxam yilalo ok hune'xa mak tzotelo yinh anma, hune' mak haka' ya' Melquisedec mach haka'o ya' Aarón, ya' titna yinh ya' Leví. ¹²Yuxin tato chihel-lax hunmajan eb'ya' sacerdote, yilal ishel-laxpaxo ley. ¹³Komam Jesucristo, Komam b'ay chitzotel hune' ti', mach yik'alo ya' Leví yehi, wal xin to yinh hunmajanxa eb'naj Israel b'ay tit Komam, yinh yik'al Komam tu' xin machi hunu mak oklena sacerdothehal. ¹⁴Kaw johtaj tato Komam Jesucristo yinh ya' Judá titna Komam, yaja' xin matzet yalkano ya' Moisés tato eb'naj chitit yinh yuninal ya' Judá tu' ay eb'naj chi'ok sacerdothehal xol anma Israel.

¹⁵Yinh hune' ti' kaw hab'anto kotxumni yuto hune' mak alaxiko sacerdothehal jinh, lahan yeb' ya' Melquisedec. ¹⁶Ok sacerdothehal yaja' maxhtaj yu hune' ley chalni tato yilal itistit yinh hune' majan ik'ale, machoj, to yu yip isq'inal Komam mach istanhb'al. ¹⁷Yuto yal Komam Dios tet Komam Jesús:

«Hach ti' sacerdote, chaxhok tzotelo yinh anma wetan yinh sunilb'al tiempo haka' ya' Melquisedec,»^s xhi Komam.

¹⁸Hunteq'an chejb'anile aq'lax yu ya' Moisés yet yalanhtokano tu' xalahwi ismunil yuto machi yip yeb' xin matzet iswatx'e. ¹⁹Hunteq'an chejb'anile tu' machi hunu mak ok k'ulal yul sat Komam Dios yu, yaja' ay hune'xa kaw k'ul okkano seleloj, ha' ton Komam Jesucristo hune' ayko yipo janma, yu hune' tu' yuxin chonhhitziko isk'atanh Komam Dios.

²⁰Hune' ayko yipo janma ti', yaq' b'inaho Komam Dios isb'i yinh yet yaltenkanoj. ²¹Eb'ya' sacerdote Israel mach yaq' b'inaho Komam Dios isb'i yet yaq'laxkano ismunil eb'ya', wal Komam Jesucristo Jahawil yaq' b'inaho Komam Dios isb'i yet yaq'nikano ismunil Komam, haka' yalni yul Yum Komam Dios b'ay chala:

«Yaq' b'inaho Komam Dios isb'i, machi xin chishel isb'a tzet chala yet yalni haka' ti':

“Hach ti' sacerdote hach, chaxhok tzotelo yinh anma wetan yinh sunilb'al tiempo,

haka' ya' Melquisedec,» xhihayoj.»

²²Yuxin ha' Komam Jesús t'inhb'ankano hune' iskab' trato kaw ek'b'al k'ul sata hune' b'ab'el.

²³Eb'ya' sacerdote yet yalanhtokano tu' machi yu iskankano eb'ya' yinh ismunil yinh hunelnhe yuto chilakamto eb'ya', yuxin kaw tx'ilal eb'ya' ek'lana yinh hune' munil tu'.

²⁴Walpaxo Komam Jesucristo machi b'aq'inhal chikami, yuxin mach chi'ek'to ismunil tu' tet hunuxa maka, wal xin sacerdote Komam yinh sunilb'al tiempo. ²⁵Yuxin chaq' Komam kolb'anile mach istanhb'al tet makta chihitziko isk'atanh Komam Dios yu Komam Jesús. Ha' Komam

^s 7:17 Sal. 110:4

xin chitzotel jinh tet Komam Dios yinh sunilb'al tiempo yu mach chikam Komam.

²⁶Ha' Komam Jesucristo tu' hanhech'an chu yok tzotelo jinh tet Komam Dios; yahawil sacerdote Komam, kaw k'ulkano Komam, machi nich'ano ismul, machi nino istx'ojal ayko yinh, pohb'ililo isb'a xol anma mulum. Ilaxto Komam isk'atanh Komam Dios satato satkanh. ²⁷Mach lahana Komam haka' eb'ya' yahawil sacerdote titna yinh yuninal ya' Leví, yuto eb'ya' tu' hunun tz'ayik yalten eb'ya' no noq' yinh xahanb'alil. Yinh b'ab'elal chaq' eb'ya' isxahanb'al yinh ismul, lahwi tu' kat yalten eb'ya' xahanb'al yinh ismul anma. Wal Komam Jesús hunelch'an yako isb'a Komam xahanb'alil yu komul. ²⁸Eb'ya' aq'lax ismunil yok yahawil sacerdote yu isley ya' Moisés masantik'a ay istx'ojal eb'ya', yaja' wal Isk'ahol Komam Dios, hune' mak b'ay yaq' b'inaho Komam isb'i yet yaq'ni ismunil yok yahawil sacerdote yet tzujanilxa, Komam tu' maxhtik'a nich'ano istx'ojal yinh sunilb'al tiempo.

Komam Jesús ha' chitzotel jinh tet Komam Dios yinh hune' iskab' trato

8 ¹Ha' hune' kaw yilal yinh hunteq'an chijal ti' to ay hune' mak yahawil sacerdote jinh, tz'onhan yinh iswatx'q'ab' Komam Dios yul satkanh. ²Ha' ismunil ha' istzotel jinh yul Yatut Komam Dios, hune' kaw yeli Yatut Komam, hune' nha tu' ha' kaw Komam Dios watx'enhe, mach anmahoj.

³Sunil eb'ya' yahawil sacerdote aq'b'il ismunil eb'ya' yalten sab'ehal yeb' xahanb'al tet Komam Dios, hakpax tu' Komam Jesús yilaltik'a ay tzet chalte Komam tet Komam Dios. ⁴Ta aytok'o Komam yul sat yib'anhq'in-al ti' matxam yilalo chi'ok Komam sacerdotahal, yuto ay eb'ya' sacerdote aq'b'il ismunil yaq'ni xahanb'al haka' yalni isley ya' Moisés. ⁵Ismunil eb'ya' sacerdote yul Yatut Komam Dios tu' yechelnhe ye yinh tzettaj ay yul satkanh. Kaw johtaj tato yechelnhe yehi yuto hayet yalanhto maxhto chiswatx'e ya' Moisés Yatut Komam Dios, yalni Komam tet ya' haka' ti': «Ab'e tzet chiwalti'an, kaw haka' yechel inyehan tawet b'ey iswi' witz, hak tu' chawute,»^v xhi Komam. ⁶Yaja' wal tinanh ayxako Komam Jesús yinh hune' munil ek'b'al isk'ulal sata ismunil eb'ya' sacerdote, yuto ha' Komam chitzotel yinh anma tet Komam Dios yinh hune' iskab' trato ek'b'al isk'ulal sata hune' yet b'ab'elal. Hune' iskab' trato tu' kaw ek'b'al isk'ulal chalte Komam Dios jet iq'b'il yu.

⁷Q'inalo ta kan anma k'ulal yu hune' b'ab'el trato matxam yilalo yaq' Komam hune' iskab' trato ti'. ⁸Yaja' yil Komam Dios ta mach k'ulo eliko hunteq'an anma tu' yul sat, yuxin yalkano Komam yul Yum:

«Ha' Komam Dios Jahawil, chalni haka' ti':

† 7:27 Lv. 9:7 † 8:1 Sal. 110:1 † 8:5 Ex. 25:40

- Chul hune' tiempohal b'ay chiwaq'an hune' iskab'trato tet anma Israel yeb' tet anma Judá.
- 9 Ha' hune' iskab'trato ti' mach lahano yeb' haka' hune' waq'an tet yichmam eb'naj yet winilojan yul tx'otx' Egipto, haka'tanhe xin inxekiltijan eb'naj. Yaja' yu mach isyije eb'naj intrato tu'an, yuxin inb'ejkanojan eb'naj.
- 10 Ha' xin hune'trato chiwaq'an tet anma Israel yinh tzujanilxa tu', ha'ton hune' ti':
Chiwakojan inchejb'anilan yinh isnab'al kat intz'ib'nhenikojan yinh yanma.
Haninan xin chinokan isDiosalój kat yok inkonhob'ojan.
- 11 Yinh hune' tiempohal tu', matxa yilalo chiskuy hunu mak yet konhob',
maka hunu mak ayto yu isb'a yeb'i yu kinyohtanhenan.
Wal xin sunil mak chinohtanhenan,
sunil nixhte unin yeb' ichamta anma.
- 12 Chiwaq'nikanojan nimank'ulal yinh istx'ojal,
matxa xin chinnatijan ismul,»^w xhi Komam.
- 13 Hayet chalni Komam ak' yinh hune' iskab'trato lanhan yalni tato ichamxa hune' b'ab'eltrato, yuto sunil tzet xa'ichamb'iloj chilahwi ismunil, hanik'xanhe xin kat istanhilój.

Hune' Yatut Komam Dios sat tx'otx'al yeb' hune' b'ey satkanh

9 ¹Hune' b'ab'eltrato tu' ay chejb'anile chihalni yinh tzet chu is-yijen eb'ya' sacerdote ismunil tet Komam Dios, yaja' yul hune' Yatut Komam sat tx'otx'al ti'. ²Hune' Yatut Komam tu', hak ti' yehi: Kab'eb' cuarto yul, pohb'ilayo yu hune' q'ap q'ap litx'ankanh yiktab'al. Hune' b'ab'el cuarto chihal-lax *Ehob'al Txahul*, ha' tu' ayikto ch'en lámpara yeb' te' mexha, yeb' ixim pan chihaltelax tet Komam Dios. ³Haxa hune' cuarto yintak'to q'ap litx'ankanh tu' *Ehob'al ek'na kaw Txahul* chihal-lax yinh. ⁴Ha' b'ey tu' ay hune' altar nab'a oro b'ay chinhuslax pom, yulikto cuarto tu' aypaxikto te' Kaxha yet Istrato Komam Dios, sunil yinh te' ayko ch'en oro. Yul te' kaxha tu' ayayto hune' xhalu nab'a oro b'ay ayayto maná, aypaxayto isq'ojoch ya' Aarón, hune' te' q'ojoch elilo iswol; aypaxayto ch'en ch'en paq'an yehi b'ay tz'ib'nheb'iliko ley. ⁵Yib'anh te' Kaxha tu' ayahto yechel kawanh eb'naj ángel chiyij querubín, ha' chalilój ta ayayo isq'aq'al ismay Komam Dios b'ey tu', leyanilto xik' eb'naj yib'anh ismajil te' kaxha tu'. Yaja' wal tinanh, mach kaw yilalo chonhok jala' yinh tzet kaw ye hunteq'an tu'.

^w 8:12 Jer. 31:31

⁶Hakton tu' ye iswatx'eb'anil Yatut Komam Dios tu'. Yul hune' b'ab'el cuarto hunun tz'ayik yokto eb'ya' sacerdote isyijeno ismunil tet Komam. ⁷Wal yul hune' Ehb'al kaw ek'na Txahul xin, hanhk'anhe ya' yahawil sacerdote chi'oktoj, yaja' xin hunelnhech'an yulb'al hab'il. Hayet chi'okto ya', iq'b'il ischik'il no noq' yu ya' yu yalten yinh ismul, yeb' yinh ismul sunil anma mach nano yu chaniko ismul.

⁸Hak tu' chu yaq'ni Komam Espíritu johtanhejoj ta hayet yokniko hune' b'ab'el cuarto tu' maxhto chihajlax b'eh japni yinh sat Komam Dios.

⁹Hune' b'ab'el cuarto tu' yechelnhe yinh hune' tiempo b'ay ayonh ti', yuto hunteq'an sab'ehal yeb' xahanb'al chihaltelaxi, mach chiswatx'eko isna'b'al anma chiyiyo isb'a b'ey tu' yinh istoholal. ¹⁰Hunteq'an chejb'an-ile tu' yinhnhe tzet chilolaxi yeb' tzet chi'uk'lax b'ay chitzoteli, yinh issajnhelax tzettaj ye tu'; hunteq'an tu' yetnhe konimanil yehi. Okniko hunteq'an chejb'anil tu' yinh ismunil masanto yet yapni istiemphal ishelni Komam tzettaj ye tu'.

¹¹Yaja' xahulik'o Komam Cristo, ha' Komam Yahawil sacerdote xayaq' isk'ulal jet, hunteq'an yilaltik'a yuli. Haxa hune' Yatut Komam Dios b'ay ayko Komam Jesús sacerdotahal kaw ek'b'al isk'ulal yeb' tz'ajan yehi, maxhtaj eb'naj winaj watx'enhe, mach yeto yul sat yib'anhq'inal ti' yehi. ¹²Xa'apni Komam Jesús sata Komam Dios satkanh, yaja' maxhtaj ischik'il no' chiw maka ischik'il no' tzehla wakax yalte Komam, wal xin to ha' kaw ischik'il Komam yalte. Xa'apni Komam sata Komam Dios yinh hunelnhe yeb' yinh sunilb'al tiempo, hak tu' yu isq'o'ji Komam yaq'nikano kolb'anile mach istanhb'al.

¹³Yinh kaw yeli ischik'il no' winaj wakax yeb' ischik'il no' chiw yeb' istanhil no' q'opo wakax chitxihlaxiko yib'anh anma mulum, ay yip issajnhenkano isnimanil anma yet payxa tu'. ¹⁴Hajxam ischik'il Komam Jesucristo to kaw ek'b'alto ay yip issajnhen janma yinh istx'ojal, yunhe koyijen yinh tzet chal Komam Dios, Komam itzitznhetik'a, yuto yu Komam Espíritu mach istanhb'al, yuxin yako isb'a Komam Cristo xahanb'alil tet Komam Dios, kaw xin machi nino istx'ojal Komam.

¹⁵Ha' iskamikal Komam Jesucristo aq'ni tanho sunil mule alaxiko yalanh hune' b'ab'el trato yaq' Komam Dios, yuxin tinanh ha' Komam Jesús chitzotel jinh tet Komam Dios yinh hune' iskab' trato ti', yunhe hanhonh awteb'ilonh yu Komam chikochah komajul mach istanhb'al halteb'ilkano yu Komam.

¹⁶Haka' hunu testamento^x watx'eb'ilkanoj, machi yip te' tato maxhto chikam naj anhekano te'. ¹⁷Machi yip hune' testamento tu' tato itzitzto naj anhekanoj, wal ta xakam naj wal tu' ay yip.

^x 9:16 Testamento, ha' ton hune' hum b'ay chala tzettaj chiyakano naj mame tet yuninal yet yalanhto maxhto chikami.

¹⁸Yuxin ha' hune' b'ab'el istrato Komam Dios yilal malto ischik'il no noq' yijnikano isb'a. ¹⁹Yuto hayet lahwi yawten ya' Moisés chejb'anil chal ley tet anma Israel, issomni ya' ischik'il no' tzehla wakax yeb' ischik'il no' chiw xol ha ha', yaniko ya' no' lana kaj yinh iswi' isq'ab' te' hisopo islab'anayto ya' xol chik' tu', istxihniko ya' yinh yumal ley yeb' yib'anh sunil anma Israel. ²⁰Yalni ya' Moisés tu' xin: «Ha' chik' ti' chit'inhb'an-kano istrato Komam Dios chaq' teyet. Yilal xin heyijen tzet chala,» xhi ya'. ²¹Istxihnipaxiko ya' Moisés chik' yinh Yatut Komam tu', yeb' yinh sunil munlab'al chi'okniko yu eb'ya' sacerdote yul Yatut Komam tu'. ²²Haka' yalni ley ta sunil tzettaj ye tu' masanto chik' chisajnheni, machi xin nimank'lulal yinh ismul anma ta machi chik' chimaltoj.

Yako isb'a Komam Jesús xahanb'alil yinh komul

²³Hunteq'an yechelnhe ye yinh tzet ay yul satkanh yilal sajnhelax yu xahanb'al, yaja' wal tzet ay satkanh choche xahanb'al ek'na k'ul sata hunteq'an tu'.

²⁴Yuto Komam Cristo maxhtaj yul hune' Yatut Komam Dios watx'e-b'il yu eb'naj winaj b'ay oktoj, hune' yechelnhe yeko yinh Yatut Komam ay yul satkanh, wal xin to kaw apni Komam sata Komam Dios yul satkanh, ha' xin Komam chitzotel jinh tet Komam Dios tinanh. ²⁵Komam Jesucristo mach hayelta yalte isb'a xahanb'alil haka' chu yokto eb'ya' yahawil sacerdote hunun hab'il yul *Ehob'al ek'na kaw Txahul*, yu yalten ischik'il no noq' xahanb'alil, maxhtaj ischik'il eb'naj chalte. ²⁶Ta hak tu', tx'i'alxam el chikam Komam yichitax iswatx'i yul sat yib'anhq'inal ti'. Wal xin ha' kaw yehi to ha' yinh islahob'al tiempo ti', ha' kaw Komam hul yaq'a'ko isb'a xahanb'alil yinh hunelnhe yu yinilo Komam komul.

²⁷Yuto sunil anma yilal hunelch'an chikami, lahwi tu' kat yil-lax yu Komam Dios yinh tzet chi'eliko. ²⁸Hak tu' xin Komam Jesucristo hunelnhech'an yaq' isb'a xahanb'alil yu yinilo Komam ismul tzetk'a anma. Wal xin chul Komam yinh iskayelal, yaja' matxataj yu yinilo ismul anma, to yu iskolni Komam makta chi'echmani.

10 ¹Yuto ha' hunteq'an xahanb'al chal isley ya' Moisés yechelnhe yeko yinh hunteq'an isk'lulal yilal yuli, maxhtaj hunteq'an tu' tzet kaw ay yul satkanh. Hunteq'an xahanb'al chaltelax hunun hab'il mach chu istz'ajb'an isk'ul anma choche ishitzako isb'a isk'atanh Komam Dios. ²Yuto ta hunteq'an xahanb'al chal isley ya' Moisés tu' chu issajnhenkano anma yinh ismul, chimisb'ej yalten xahanb'al, yuto matxa ismul chab'e.

³Wal xin ha' isxahanb'al anma chilayaq' hunun hab'il tu', ha' ch'aq'-ni isnab' anma isnahniti ismul. ⁴Yuto ischik'il no' winaj wakax yeb' no' chiw, mach chiq'oji yinilo ismul anma.

⁵Yuxin yet yul Komam Jesucristo yul sat yib'anhq'inal ti' yalni tet Komam Dios haka' ti':

«Matxa chisje hak'ul ch'aq'lax xahanb'al yeb' sab'ehal tawet, yuxin aq'b'il innimanilan hawu, ha' chiwaq'an yinh xahanb'alil tawet.

6 Mach chitzala hak'ul yinh xahanb'al chinhuslaxi yeb' sab'ehal chi-aq'lax tawet yu yinilo mule.

7 Yuxinto chiwalan tawet: Mamin, hach inDiosalan, ayinan lah yu inyijenan tzet chawala, haka' yu istz'ib'nhelaxkano winhan yul Hawum,»^y xhi Komam.

8 Yinh b'ab'elal, yal Komam Cristo ta mach isje isk'ul yeb' mach chitzala Komam Dios tato chi'aq'lax xahanb'al yeb' sab'ehal tet, yeb' no noq' chinhuslaxi yu yel ismul anma, waxanhka xin hak tu' yalni ley. ⁹Lahwi tu' yalnipaxo Komam: «Mamin, hach inDiosalan, ayinan lah yu inyijenan tzet chawala,» xhi Komam. Chal yelapnoj ta chilo hunteq'an b'ab'el xahanb'al tu' kat yaniko hune' ak'. ¹⁰Xakonhyako Komam Dios yetoj yuto isyije Komam Jesucristo tzet yal isk'ul Komam Dios yet yalten isb'a yinh xahanb'alil yinh hunelnhe.

¹¹Sunil eb'ya' sacerdote Israel hununnhetik'a tz'ayik ayko yinh ismunil yalten xahanb'al yeb' xin hune'nhetik'a ha' xahanb'al chalte, waxanhka xin mach chu yinilo mule.^z ¹²Yaja' wal Komam Cristo hunelnhech'an yako isb'a xahanb'alil yinh komul yinh sunilb'al tiempo, lahwi tu' yok tz'onhno Komam yinh iswatx'q'ab' Komam Dios. ¹³Ha' tu' ay Komam yechman yalaxiko sunil mak ayko ishowal yinh yalanh yoj.^a ¹⁴Yuto hune'nhe xahanb'al yaq' Komam konhyaniko yinh istoholal yinh hunelnhe hanhonz yetonhxa Komam ti'.

¹⁵Chaq'paxo isb'a Komam Espíritu Santo yinh hunteq'an ti' yet chalni:

¹⁶«Hune' intratohan chiwaq'an tet anma Israel yet tzujanilxa, ha' ton hune' ti':

Chiwakojan inchejb'anilan yul yanma yeb' yinh isnab'al,»^b xhi.

¹⁷Lahwi tu' yalnipaxoj:

«Matxa b'aq'inhal xin chinnatijan ismul yeb' istx'ojal,»^c xhi Komam.

¹⁸Yuxinto ayxa nimank'ulal yinh mule, matxa yilalo chi'aq'lax xahanb'al hunelxa.

Hitzojonhweko sata Komam Dios yinh sunil janma

¹⁹Yuxin tinanh hex wuxhtaj hex wanab', yinhxa sunil janma chonhapni yinh sat Komam Dios b'ay ay yehob'al kaw ay yelapnoj, yaj yu ischik'il Komam Jesucristo. ²⁰Chu japni yu hune' ak' b'eh chi'aq'ni q'inala iswatx'e Komam yet istzilmoyo q'ap q'ap aykanh yul Yatut Komam Dios yet iskam Komam Jesús.

^y 10:7 Sal. 40:6-8 ^z 10:11 Ex. 29:38 ^a 10:13 Sal. 110:1 ^b 10:16 Jer. 31:33

^c 10:17 Jer. 31:34

²¹Komam Jesús ha' chitzotel jinh hanhonh yuninalonhxa ti', sacerdote kaw niman yelapno Komam. ²²Yuxin hitzojonhweko yinh sunil janma sata Komam Dios, jaq'awayto yul janma yinh kaw isyelal yuto sajxa ye janma yu ischik'il Komam, matxa istx'ojal chi'etanto konab'al; yeb' xin sajxa ye konimanil yu ha ha' kaw saj.

²³Kolinhb'awe kob'a yinh kuyb'anile xajab'e ti', machojab' chikab'kon kok'ul yinh tzet ayko yipo janma, hune' b'ay tzujan honhikoj, yuto chij isb'a tzet halteb'il jet yu Komam Dios.

²⁴Kosaya'we yinh tzet chu kokolwa jinh hununonh, haxinwal chikolahiko koxahannhen kob'a kat kowatx'en isk'ulal jinh hununonh.

²⁵Machojab' chikob'ej kokutxb'an kob'a, haka' chute hunteq'an eb'naj, wal xin jiptzewe kob'a hununonh, yuto lanhan isyenilo isb'a tato lanhan ishitzti tiempo b'ay chihul Komam Jesucristo.

²⁶Yuto ta lahwi johtanhenilo isyelal hune'nhetik'a ha' xin janiko komul, matxa hunuxa xahanb'al chu yaq'ni tanho komul chijako tu'. ²⁷Ta hak tu' toxanche chijechma yul hune' niman isya'tajil jib'anh yeb' q'a q'a' toxanche chinhilxi chitanhtzenilo sunil makta ayko ishowal yinh Komam Dios. ²⁸Yet chismanhk'on hunu mak isley ya' Moisés, ta ay xin kawanh maka oxwanh mak chalni tato yeli manhk'om hune' mak tu', maq'b'il ismaq'laxkamoj, matxa nimank'ulal yinh. ²⁹Hajxam mak chiyahni Isk'ahol Komam Dios yeb' matzet chalilo ischik'il Komam yul sat, chinilo ispixan Komam Espiritu Santo, Komam chonhocheni. Hunteq'an mak tu' kaw ek'b'alto isya'tajil chi'ay yib'anh, yuto ha' ischik'il Komam Jesucristo t'inhb'ankano istrato Komam Dios, konhyanipaxiko yeto Komam. ³⁰Kaw johtaj tato halb'ilkano yu Komam Dios, haka' ti': «Haninnhehan chiwilan yinh tzet chi'eliko anma, haninan chiwaq'an ispaj selet tet,»^d xhi Komam. Chalnipaxo yul Yum Komam: «Ha' Komam Dios Jahawil chi'ilni yinh tzet chi'eliko iskonhob'!» xhihayoj. ³¹¡Kaw ay ismay yet chanayo Komam Dios itzitz isya'tajil jib'anh!

³²Naweti yet yalanhtokanoj yet hechahni issajilq'inal yul heyanna kaw heyaq' techaho isya'tajil hul teyib'anh. ³³Hex ti' kexb'ahlaxi, heyetalax sata anma, ay hex xin hul isya'tajil teyib'anh yu kexkolwa yinh mak aq'lax ek'oya' yanma tu'. ³⁴Kaw tz'aypaxo hek'ul yinh eb'naj alaxikto yul preso, machi xin ok b'isk'ulal yinh hek'ul yet yilaxilo tzet ay hex yuto heyohraj ta ek'b'alto isk'ulal chi'aq'lax teyet yul satkanh, hunteq'an machi b'aq'inhal chilahwi. ³⁵Yuxin machojab' cheb'ej iskawxi hek'ul, yuto niman ispaj selet ch'aq'lax teyet. ³⁶Kaw yilal niman cheyute hek'ul heyaq'ni techaho isya'tajil, haxinwal chu hewatx'en tzet choche isk'ul Komam Dios hak tu' xin chechah tzet halteb'ilkano yu Komam. ³⁷Yuto chal yul Yum Komam Dios:

^d 10:30 Dt. 32:35

«Kaw hanik'xanhe b'ay chul Komam,
Komam yilal yuli, kaw mach chi'ek'to yet yuli.

38 Ha' mak xakan k'ulal yul sat Komam Dios maxhtik'a chisb'ej iskawxi
isk'ul yinh Komam,
yaja' wal mak chimeltzo yintaj mach chitzala isk'ul Komam
yinh,»^e xhi yul Yum Komam.

39 Yaja' wal hanhoh ti' mach chonhmeltzo jintaj haka' eb'naj chimeltzo
yintaj kat istokano yinh isya'tajil. Wal hanhoh ti' chikochah kokolb'anil
yuto xajayto yul janma yinh Komam.

Eb'ya' yayto yul yanma yinh Komam Dios

11 ¹Hayet chijanayto yul janma yinh Komam Dios, ha' chal yelapnoj
ta ayko yinh janma kochahni tzet echmab'il ju, yeb' xin t'inhan
jekoj ta chijil yinh hunteq'an tzet maxhto chijiliko yinh. ²Eb'ya' ischejab'
Komam ek'lana yet payxa kan eb'ya' k'ulal yu yayto eb'ya' yul yanma
yinh Komam.

³Yu chijayto yul janma yinh Komam Dios, yuxin johtaj ta yu Istzoti'
Komam xin iswatx'e sunil tzet ay yul sat yib'anhq'inal ti' yeb' satkanh.
Yuxin sunil tzet watx'eb'il chijil tinanh, mach yinho tzet watx'eb'ilxa
titnaj.

⁴Yu yayto naj Abel yul yanma yinh Komam Dios yuxin yalte hune'
xahanb'al ek'b'al k'ul sata yet naj Caín. Hak tu' yu iskankano naj k'ulal
yul sat Komam Dios, ischahni Komam isxahanb'al naj. Waxanhka kamna-
xa naj Abel tu', yaja' yexnhe istzotel naj jet yu yayto yul yanma yinh
Komam Dios.

⁵Yu yayto ya' Enoc yul yanma yinh Komam Dios yuxin ilaxto ya'
satkanh yu Komam, mach yil ya' kamikal, matxa xin hunu mak ilni
ya'. Chal yul Yum Komam Dios tato yet yalanhto maxhto chi'ilaxto ya'
satkanh tu' kaw tzala Komam Dios yinh tzet iswatx'e ya'. ⁶Yuto ta machi
jayto yul janma yinh Komam Dios mach chitzala Komam yinh tzet chi-
kowitz'e, yuto ha' mak choche chihitziko isk'atanh Komam Dios yilal
yanayto yul yanma tato ay Komam Dios yeb' ta chaq' Komam ispaj tet
makta yinh sunil yanma chisayni Komam.

⁷Yu yayto ya' Noé yul yanma yinh Komam Dios, yuxin hayet yalni
Komam ta chaq' hune' niman yaxnhab' isyijen ya' tzet yal Komam, yok
ya' iswatx'eno hune' barco b'ay chikolcha ya' yeb' yixal yeb' oxwanh
isk'ahol yeb' eb'ix alib'e, waxanhka xin maxhto ixtanho hune' nhab' tu'.
Yu yayto ya' Noé yul yanma yinh Komam Dios yuxin kolcha ya', wal
anma xin tanhilo sunil. Iskankano ya' k'ulal yul sat Komam Dios, yu
yayto ya' yul yanma yinh Komam.

^e 10:38 Hab. 2:3-4

⁸Yu yayto ya' Abraham yul yanma yinh Komam Dios, yuxin hayet yawtenilo Komam ya', kaw yijem yute isb'a ya' isto sat hune' tx'o tx'otx' halb'ilkano yu Komam Dios ta ch'aq'lax ismajuloj. Waxanhka xin mach yohtajo b'ay ch'apnikanoj, yaja' isb'ejkano ya' iskonhob', isto ya'. ⁹Kaw yayto ya' yul yanma yinh Komam Dios, isto ya' ehoyo sat tx'o tx'otx' yalte Komam Dios; yaja' haka' wayanhb'al yu yek' ya' sat tx'otx', is-watx'en ya' q'ap mantiado yatutoj. Hakpax tu' xin ya' Isaac yeb' ya' Jacob, yuto ha' hun eb'ya' yinh tzet yalte Komam tu' tet ya' Abraham. ¹⁰Yuto ya' Abraham tu' ha' hune' konhob' kaw k'ul yehayto isxe', ha' echmab'il yu ya'. Hune' konhob' ha' kaw Komam Dios anayo ismalil, ha'-tik'a xin Komam watx'eni.

¹¹Hakpax tu' ya' Sara yayto ya' yul yanma yinh Komam Dios, yuxin waxanhka kaw ixnamxa yeb' xin maxhtik'a hunu yunin, yaja' aq'lax yip ya' yuninwi. Ispitzk'a nich'an yunin yeb' yichamil yuto yayto ya' yul yanma ta ha' tzet chalte Komam Dios masan chiyij isb'a. ¹²Waxanhka kaw ichamxa ya' Abraham, yaj kaw hantanhe anma pohchakanh yinh. Kaw haka' isb'isil tx'umel yeb' arena ay isti' ha' mar, machi hunu mak chu isb'isni.

¹³Sunil hunteq'an eb'ya' tu' mach ischah eb'ya' tzet yalte Komam Dios, wal xin kamto eb'ya', yaja' yayto eb'ya' yul yanma yinh Komam; yuxinto haka'tanhe yilto eb'ya' yinh tzet halteb'ilkano yu Komam tu' yinh nahat, kaw xin tzala eb'ya' yinh. Hak tu' yu isyenilo eb'ya' tato mach iskonhob' eb'ya' ye hune' yul yib'anhq'inal ti', wal xin ek'omnhe ye eb'ya'. ¹⁴Yuxin ha' mak chitxumni haka' tu', chisyeloy ta lanhan issayni hune' yehob'al b'ay chi'ehi.

¹⁵Yaja' ta ha' b'ay titna eb'ya' ha' b'ay ayko isnab'al, meltzomi eb'ya' yintaj. ¹⁶Yaja' wal xin, ha' hune' ehob'al ek'na k'ul ay yul satkanh, ha' ayko yinh isnab'al eb'ya'. Yuxin mach chitx'ixwi Komam Dios yet chalni eb'ya' Komam isDiosaloy, yuto ay hune' iskonhob' eb'ya' watx'eb'il yu Komam.

¹⁷Yu yayto ya' Abraham yul yanma yinh Komam Dios, yuxin yito ya' hunpilan isk'ahol yu yaq'ni yinh xahanb'alil, yet yilwelax ya' yu Komam Dios; kaw hinan ya' yalten yinh xahanb'alil, waxanhka xin halb'il tet ya' yu Komam haka' ti': ¹⁸«Yinh ya' Isaac chipohcha hawuninal,» xhi Komam. ¹⁹Yuto yohta ya' Abraham tu' ta ay yip Komam Dios ispitck'an-kanh kamom, yuxin haka'tik'a aq'b'il itzitzb'okanah ya' Isaac, yaq'lax ya' tet ismam.

²⁰Yu yayto ya' Isaac yul yanma yinh Komam Dios, yuxin yalanhto yalni ya' yinh hunteq'an isk'ulal chischah ya' Jacob yeb' naj Esaú yu Komam Dios.

²¹Yu yayto ya' Jacob yul yanma yinh Komam Dios, yuxin hayet toxa chikami, yalnikano yinh hunteq'an isk'ulal chischah hunun eb'naj

isk'ahol ya' José, yay xulno ya' yib'anh iswi' isq'ojoch, yaq'ni tzalaho isk'ul yinh Komam Dios.

²² Yu yayto ya' José yul yanma yinh Komam Dios, yuxin yet yalanhto maxhto chikami, yalnikano ya' tato ay hune' tz'ayikal ti' b'ay chi'el eb'naj Israel sat tx'otx' Egipto. Yalnipaxkano ya' tato chiyito eb'naj Israel tu' is-b'ajil isnimanil ya' yet chi'el eb'naj sat tx'otx' Egipto tu'.

²³ Yu yayto ismam yeb' ismi' ya' Moisés yul yanma yinh Komam Dios yuxin hayet ispitzk'a ya' yeb'alaxilo oxeb' ixahaw, yuto kaw k'ulch'an jilni. Mach xin xiw ismam yeb' ismi' tet chejb'anile yaq' naj isreyal Egipto tato chipotx'lax nixhte winaj unin.

²⁴ Yu yayto ya' Moisés yul yanma yinh Komam Dios, yuxin hayet icham tzeh ya' matxa yoche oko yunino ix iskutz'in naj rey Egipto tu'. ²⁵ Wal xin to ha' yek'ya' yanma ya' yinta iskonhob' Komam Dios, ha' issayilo ya' sata yaq'ni tzalaho yanma ya' yinh hunteq'an tzalahilal yet yul sat yib'anh-q'inal ti', hunteq'an pet chitanhiloj. ²⁶ Istxumnilo ya' tato ek'b'alto k'ul yek'ya' yanma ya' yu Komam Cristo sata yochen ya' isq'alomal tx'otx' Egipto tu', yuto ha' yinh tzet chaq' Komam ispajo tet ya', ha' b'ay ayko yanma ya'.

²⁷ Yu yayto ya' Moisés yul yanma yinh Komam Dios, yuxin el ya' yeb' eb'naj Israel sat tx'otx' Egipto, machi xin xiw ya' ta chitit ishowal naj rey tu' yinh ya'. Kaw yinhnhe Komam Dios yako isnab'al, haka'tanhe kaw yiliko ya' yinh Komam, Komam machi jiliko yinh. ²⁸ Yu yayto ya' Moisés yul yanma yinh Komam Dios, yuxin yek'tze ya' q'inh Pascua, ischejni ya' txihlaxoko ischik'il no' me' yinh iswi' yeb' yinh isk'ul ispultahil yatut eb'naj Israel, yunhe mach ispotx' naj ángel aq'omkamo anma isb'ab'el k'ahol eb'naj Israel tu'.

²⁹ Yu yayto eb'naj Israel yul yanma yinh Komam Dios, yuxin ispoh isb'a ha' Kajinh Mar, yek'to eb'naj yiktab'al ha', kaw xin tajin b'ay ek'to eb'naj. Haxa yet yek'to eb'naj Egipto yalni, ishunb'an isb'a ha', ishiq'nito eb'naj ha', iskamilo eb'naj.

³⁰ Yu yayto eb'naj Israel yul yanma yinh Komam Dios, yuxin hayet lahwi hujeb' tz'ayik yek' hoyon eb'naj yinh konhob' Jericó yay wuyna isk'ub'al hune' konhob' tu'. ³¹ Yu yayto ix Rahab, ix tx'oj ye iswi', yul yanma yinh Komam Dios, yuxin mach kam ix yinta makta manhk'om, yuto k'ul yu ischahni ix eb'naj Israel b'eyk'o ilwal yinh konhob' tu'.^f

³² ¿Maktaxka hunuxa chiwalan tinanh? Kaw matxam tiempo ta chinokan tzotelo yinh ya' Gedeón, ya' Barac, ya' Sansón, ya' Jefté, ya' David yeb' ya' Samuel yeb'paxo eb'ya' ischejab' Komam Dios yet payat.^g ³³ Yu yayto eb'ya' yul yanma yinh Komam Dios, yuxin ay eb'ya' q'oji yinh nimeta konhob', aypaxo eb'ya' watx'en istoholal yet yok yahawil, ay

^f 11:31 Jos. 6:22-25 ^g 11:32 Jue. 13:2—16:31

eb'ya' ischah tzet halteb'il yu Komam Dios, ay eb'ya' majchen isti' no' b'alam. ³⁴Ay eb'ya' q'oji isb'utni nimeta q'a', ay eb'ya' kolcha tet ch'en espada, ay eb'ya' machi yip yaj hul yip, kaw xin k'ul elkaniko eb'ya' yinh howal, isq'oji eb'ya' yinh eb'naj aq'om howal tit yul hune'xa nan konhob'al. ³⁵Aypaxo eb'ix ix itzitzb'ikanh yunin yu yayto yul yanma yinh Komam Dios.

Ay eb'ya' kaw ya'ta yu iskami, yu mach chisje eb'ya' ismanhk'o tzet chal Komam Dios yuto choche eb'ya' chi'aq'lax itzitzb'okanh yinh hune' q'inale mach istanhb'al.

³⁶Ay eb'ya' ek'ya' isb'ahlaxi ishatelaxpaxoj, ay eb'ya' k'alb'alax yu ch'en cadena, ay eb'ya' alaxikto yul preso. ³⁷Aypaxo eb'ya' q'ojlax kamoj, ay eb'ya' k'uplaxayo yikta yu ch'en serrucho, ay eb'ya' alaxiko yinh ilweb'al, aypaxo eb'ya' aq'laxkamo yu ch'en espada. Ay eb'ya' nananta b'ay ek'le, xil no' me' yeb' xil no' chiw ayko xilo isq'ap, yaq'len meb'a'il yeb' isya'tajil, isb'ahlaxpaxoj. ³⁸Anma yul sat yib'anhq'inal ti' mach yeto ay eb'ya' yek' xol, machi hunu b'ay kaw ehayo eb'ya', wal xin to ha' sat tx'otx' desierto ek' eb'ya' yeb' iswi'la witz yeb' yulaj ch'en nhach'en, yeb' yulaj tx'o tx'otx' holan ek' eb'ya'.

³⁹Sunil eb'ya' ti', waxanhka kaw k'ul isb'eyb'al yu yayto eb'ya' yul yanma yinh Komam Dios, yaja' machi hunu eb'ya' chahni tzet halteb'il yu Komam Dios. ⁴⁰Yuto ayonhiko yinh isnab'al Komam Dios yinh hune' tzet ek'b'al k'ul tu', yuxin mach yij isb'a tzet nab'il yu Komam yinh eb'ya' ischukil, wal xin to chihuniko eb'ya' jinta yinh istoholal.

Yinhnhe Komam Jesús chijako konab'al

12 ¹Yuxin kotxumu'loj ta haka' hoyb'ilonh yu sunil makta yayto yul yanma yinh Komam Dios, yuxin kob'eja'wekano sunil tzet chonhetantoj yeb' mule chonhaq'ni ayk'ayoj; kat jaq'ni janma kolahniko yinh hune' anhe b'ay ayonhikoj. ²Jaqa'weko konab'al yinh Komam Jesús, yuto ha' Komam aq'ni pitzk'aho janayto yul janma yinh Komam Dios, ha' Komam xin chitz'ajb'anpaxkanoj. Yako isb'a Komam yul isq'ab' kamikal yinh te' kulus, machi xin yok yinh waxanhka kaw tx'ixob'al hune' kamikal tu', yuto yohta Komam ta lahwi yek'ya' yanma tu' kat ischahni tzalahilal. Tinanh xin tz'onhan Komam yinh iswatx'q'ab' Komam Dios.

³Yuxin txumwe yinh tzet yu yaq'ni techaho Komam Jesús isya'tajil yu anma mulum, haxinwal mach chitib'ayo heyu yeb' xin mach chexpax teyintaj. ⁴Waxanhka ayko ip heyu heq'oji yinh istx'ojal, yaja' maxhto hunujex ti' cheyab'e isya'il kamikal. ⁵Yaja' xin xato nahul heyu yinh tzet chal Komam Dios jet yul Yum hanhonh konhyuninal, b'ay chala:

«K'ahol, machojab' chiskaj hawi' yet chaxhiskuyini Komam Dios Jahawil.

Machojab' xin chaxhmeltzo tawintaj yet chaxhiskachni Komam.

6 Yuto ha' mak xahan ay yu Komam chako Komam yinh istoholal.

Haxa mak chischah Komam yuninaloj chayo Komam isya'tajil yib'anh yu iskuychahi,»^h xhi yul Yum Komam.

7 Chahwe isya'tajil chati Komam Dios teyib'anh yu hekuychahi, yuto kexyuninalxa Komam yuxin hak tu' chexyute. ¿Tom ay hunu naj k'ahole ti' mach chikuytax yu ismam? 8 Yaja' ta mach chayo Komam isya'tajil yu hekuychahi haka' chu Komam yinh makta yuninalxa, chal yelapno chal tu' ta mach kexyuninaloj, lahan hex haka' nixhte unin machi ismam.

9 Konab'awetij haka' yet nixhte uninonh, aq'lax kokachb'anil yu komam yeb' yu komi', kaw xin jab'e yinh tzet yala, ¿hatom xin tzet chal Komam Dios ay yul satkanh, mach chikoyije yunhe kochahni koq'inal?

10 Komam komi' tu' konhiskach hanik' tiempohal haka' yoche isk'ul, hajxam Komam Dios chonhiskach Komam yu isk'ulalo jinh, yunhe jelkaniko haka' Komam, Komam machi nino istx'ojal yinh. 11 Yinh kaw yeli yet chihul isya'tajil jib'anh yu kokuychahi, mach chitzala kok'ul yet chihul jib'anh, wal xin to b'isk'ulal chulo kok'ul, yaja' lahwi tu' chaq'ni istoholal jet yeb' aq'ank'ulal makonh b'ay chi'alaxayo isya'tajil tu'.

Kaw ay ismay ta chikob'ejkano jab'ento tzet chal Komam Dios

12 Wal hex haka'tanhe paxna yip heq'ab' yeb' heyoy, aq'we heyanna yok yip heq'ab' yeb' heyoy tu'. 13 Saywelo hune' b'eyb'ale kaw tohol haxinwal chi'anhcha heyoy, hak tu' xin matxa kaw chi'ahkanh iskotxq'ahi.

14 Aweko yinh hek'ul heyek' yinh aq'ank'ulal yeb' sunil anma, machojab' nino istx'ojal teyinh, yuto ha' mak chib'eyb'alnhen istx'ojal mach chiyil yinh Komam Dios. 15 Kaw cheyil heb'a, haxinwal machi hunujex cheb'ej hechahni isk'ulch'anil isk'ul Komam Dios chaq' jet, yeb' yunhe mach chipitzk'a chichonk'ulal texol yuto ta hak tu' tx'i'al hex chexetaxto yu, lahan haka' te' howla telaj chikam anma yu. 16 Machojab' hunujex ti' chexek' yinh ixloj, yeb' xin machojab' hunujex cheyah isk'ulal chaq' Komam Dios teyet haka' yute naj Esaú; ishelto naj issab'ehal yet b'ab'el k'ahole yinh hune' sek' itah. 17 Kaw heyohtaj ta haxa yet tzujanilxa yet yochen naj ischab' ismajul yeb' isk'ulal Komam Dios, haka' chi'aq'lax tet eb'naj b'ab'el k'ahole, matxa aq'lax tet naj, waxanhka kaw oq' naj sik'lebl'il, yaja' matxa tzet tz'aj yute' isb'a naj.

18 Hex ti' mach hitznajexiko yinh hunu tzet ye tu' chisje kotzab'ni, haka' yu ishitziko eb'naj jichmam Israel yinh witz Sinaí, hune' witz b'ay kaw ah xaj q'a q'a' yinh, b'ay kaw q'ejholiloj yeb' b'ay kaw nhirla k'uh. 19 Machi xin heyab'e yoq' ch'en trompeta yeb' istzotelpaxo Komam Dios. Hayet yab'en eb'naj istzotel Komam tu', yok eb'naj yalnoj ta matxa chitzotel Komam,ⁱ 20 yuto machi techa hune' chejb'anile yu eb'naj, hune'

^h 12:6 Job 5:17; Pr. 3:11-12 ⁱ 12:19 Ex. 19:16-22; 20:18-21

chalni haka' ti': «Tato ay hunu mak chayo voj yib'anh witz ti' maka hunu no noq', yilal isq'ojlaxkamoj maka chitejlaxkamo yu ch'en lanza,» xhi. ²¹Kaw xiwkilta tzet yil eb'naj tu', yuxin ha' hun ya' Moisés halni haka' ti': «Kaw chinluylunkanhan yu xiwkilal,» xhi ya'.

²²Wal hex ti' xakexhitziko yinh witz Sión, ha' iskonhob' Komam Dios itzitz, ha' ton hune' Jerusalén ay satkanh. Xakexhitziko isk'atanh ismilal eb'naj ángel kutxaniko yaniko ismay Komam Dios, ²³yeb' isk'atanh makta b'ab'el yuninal Komam Dios tz'ib'nheb'il isb'i yul satkanh. Xakexhitziko isk'atanh Komam Dios, Komam juez yeko yinh sunil anma, yeb' b'ay ay yanma anma k'ulxa yeb' tz'ajanxa ye yu Komam Dios. ²⁴Xakexhitziko yinh Komam Jesús, Komam watx'enheyo iskab'trato Komam Dios. Ha' ischik'il Komam Jesús tu' konhsajnhen yinh komul, ha' chiq'anni niman-k'ulal jinh tet Komam Dios. Mach haka'o ischik'il naj Abel, to ha' yanayo Komam isya'tajil yib'anh mak potx'ni naj, ha' isq'ana.

²⁵Yuxin nannhe heyu tajka chemanhk'oto Komam Dios chitzotel jet, yuto ta hunteq'an mak manhk'onto Komam Dios yet istzotel tet sat tx'o tx'otx' ti' mach kolcha tet isya'tajil, ¿ha' tom xin hanhoh chonhkolchahi ta chikomanhk'oto Komam Dios chitzotel jet yul satkanh? ²⁶Yet istzotel Komam Dios yet payxa tu' kaw b'ili tx'o tx'otx', yaja' tinanh xin chal Komam haka' ti': «Hunelxanhech'an chintzotelan maxhnhetaj xin tx'o tx'otx' ti' chiwaq'-b'ilojan, wal xin ha' hun satkanh chib'ilipaxoj,» xhi Komam. ²⁷Hayet chalni Komam, *hunelxanhech'an*, chal yelapnoj tato hunteq'an tzet chu ishek'lax yul yehob'al watx'eb'il yu Komam Dios, chihek'laxiløj kat istanhtzelaxiløj, yunhe iskankano hunteq'an tzet mach chu ishek'laxi.

²⁸Hak tu' tzet aq'b'il jet yu Komam Dios, hune' yet jok yul isq'ab', mach chu ishek'laxi. Yuxin jaq'a'we yuch'andiosal tet Komam Dios yinh hune' tu', kat jinayo kob'a tet Komam yinh sunil janma, haka' kaw choche Komam. Xiwojonhwepaxo tet Komam. ²⁹Yuto Komam Dios lahan haka' q'a q'a' chitanhilo sunil tzet ye tu' yu.

Hunteq'an yilal iswatx'en yuninal Komam Dios

13 ¹Machojab' cheb'ej hexahannhen heb'a hunun hex, yuto heyuxhtaxa heb'a yinh Komam. ²Machojab' chenahulnheto hey-aq'ni b'ay chiway mak chi'ek' tek'atanh, yuto ay mak ti' aq'ni b'ay chiway yet anmahil, machi xin yohtajoj tato ángel eb'naj ek' isk'atanh.

³Machojab' chenahulnhepaxto eb'naj ayikto yul preso, hakojtam ha' hunex ayexiko preso yinta eb'naj. Nawepaxti makta chi'aq'len isya'tajil, hakojtam hex hunex cheyaq'lepaxo isya'tajil yintaj.

⁴Hayet cheyiq'ni heyetb'i, ayojab' yelapno mohyilal yul hesat; yinhnhehojab' heyetb'i cheyako heyanna, yuto ha' mak chi'ixli yeb' chiwinajli, chi'ay isya'tajil yib'anh yu Komam Dios. Yeb'paxo ha' mak maxhto chimohyi kat issayni ismul, chi'aypaxo isya'tajil yib'anh yu Komam.

⁵Machojab' cheyako heyanna yinh ch'en melyu. Aq'we tzalaho he-
k'ul yinh tzet ay yul heq'ab', yuto chal Komam Dios yul Yum: «Machi
b'aq'inhal chexinnahulnhetojan yeb' chexinb'ejkanojan,»^j xhi Komam.

⁶Yuxin sunil janma chijalni haka' ti':

«Ha' Komam Dios Jahawil chikolwa winhan,
yuxin mach chinxiwan yinh istx'ojal choche anma iswatx'e
winhan,»^k konhchi.

⁷Machojab' chenahulnheto eb'ya' ijb'ali teyinh yeb' halni Istzoti'
Komam Dios teyet. Txumwek'anab' yinh isb'eyb'al eb'ya', haka'ojab' yu
yaniko yanma eb'ya' yinh Komam Dios hakojob' tu' heyanniko heyanna
yinh Komam.

⁸Komam Jesucristo hune'nhetik'a ha' Komam, ha' Komam yet payxa,
ha' Komam tinanh, ha'paxo Komam yinh sunilb'al tiempo. ⁹Mach cheyaq'
sub'chaho heb'a tet hunteq'an nan kuyb'anile mach ohtab'ilo ju. Ha'ojab'
yinh isk'ulch'anil isk'ul Komam Dios chiyiq' yip janma, maxhtaj yinh
hunteq'an chejb'anile yinh tzet chilolaxi, yuto hunteq'an tu' matzet chijiq'
yinh.

¹⁰Hanhonh ti' nanxa hune' koxahanb'al; eb'ya' sacerdote ayko yalanh
isley ya' Moisés, machi yok eb'ya' yinh isk'uxni hune' xahanb'al ti'.

¹¹Eb'ya' yahawil sacerdote chikto eb'ya' ischik'il no noq' yul Ehob'al
ek'b'al Txahul isb'i, ha' chaq'b'alnhe eb'ya' yinh ismul anma; yaja' wal is-
nimanil no noq' tu' istxam konhob' chinhuslaxi. ¹²Hakpax tu' yu Komam
Jesús, kam Komam istxam konhob' Jerusalén yunhe issajnhenkano
Komam yanma anma yu ischik'il.

¹³Yuxin elojonhweto haka' b'ay ilaxilto Komam istxam konhob' tu', ha'
chal yelapnoj ha' hunonh chi'aq'lax elo kotx'ixob'al yinta Komam. ¹⁴Yuto
maxhtaj yul sat yib'anhq'inal ti' ay hune' kokonhob' ay yinh hunelnhe,
wal xin ha' hune' kokonhob' ay yinh sunilb'al tiempo ha' b'ay ayto janma.

¹⁵Yuxin jala'we k'ul-la tzoti' yinh Komam Dios sunilb'al tiempo yu
Komam Jesucristo. Ha' hune' koxahanb'al chijaq' tet Komam, ha' ton ko-
b'itnhen isb'i Komam yu koti'. ¹⁶Machojab' chenahulnheto hewatx'en
isk'ulal yeb' hekolwa yinh tzet ay hex yinh heyet anmahil, yuto ha'paxo
hunteq'an tu' koxahanb'al tet Komam Dios, kaw xin chitzala Komam yinh.

¹⁷Yijewe yinh tzet chal eb'ya' chi'ijb'ali texol, watx'ewe tzet chal eb'ya'
yuto ha' eb'ya' chexiptzeni, yeb' xin ha' eb'ya' chihalni tet Komam Dios
yinh tzet chewatx'e. Yuxin aweko yinh hek'ul hewatx'en isk'ulal, haxin-
wal yinh tzalahilal chitaq'wi eb'ya' teyinh tet Komam, mach yinho
b'isk'ulal, ta mach xin mach chechah isk'ulal.

¹⁸Hanhonhti'anh k'ul kob'eyb'alanh, machi istx'ojal nab'il juhanh.
Txahlanhwe jinhanh yuto chijochehanh chonhek'anh yinh sunil isk'ulal.

¹⁹Ha' hune' kaw yilal chinq'anpaxojan teyet ta chectxahli winhan tet Komam Dios, haxinwal ta hak tu' chi'el yinh isk'ul Komam, chinapnihan kexwila'an yinh anhe.

Q'anlax isk'ulal yib'anh eb'naj juxhtaj yeb' eb'ix janab'

²⁰Ha'ojab' Komam Dios yahawil aq'ank'ulal yeb' aq'ni itzitzb'okanh Komam Jesús xol kamom, Komam kotanhemal yeb' xin t'inhb'ankano istrato Komam Dios mach istanhb'al yu ischik'il. ²¹Ha'ojab' Komam Dios tu' chi'aq'ni hehelanil hewatx'en sunil isk'ulal, haxinwal chewatx'e tzet chal isk'ul Komam kat iswatx'en Komam tzet choche isk'ul teyinh yu Komam Jesucristo. ¡Jaq'a'weko ismay Komam Dios yinh sunilb'al tiempo! Hakojab' tu'.

²²Hex wuxhtaj hex wanab', chinq'anan teyet niman cheyute hek'ul hechahni hekuyb'anil chiwaltojan teyet ti', hanik'nhe tzet xin chiwaltojan teyet yul hune' incartati'an. ²³Chiwaltojan teyet ta xab'ejtzolax juxhta Timoteo. Ta pet chul naj ink'atanhan chito naj wintajan yet chintohan kexwilnojan.

²⁴Halwe tet eb'ya' chi'ijb'ali teyinh ta chil isb'a eb'ya' yeb' sunil mak ayxako yul isq'ab' Komam. Eb'naj juxhtaj yeb' eb'ix janab' ay yul ismajul Italia ti' chalto ta cheyil heb'a yinh hekawil.

²⁵Yaq'ab'ayo Komam Dios isk'ulch'anil isk'ul teyib'anh hesunil. ¡Hakojab' tu'!